

佩文齋廣羣芳譜卷第九十三

藥譜

甘草

**原**甘草

甘古作昔

一名國老一名靈通一名美草一名蜜草

一名蜜甘一名落草生陝西河東州郡青州間亦有之  
春生青苗高三四尺枝葉悉如槐葉端微尖而糙濇似  
有白毛七月開紫花冬結實作角子熟時角拆子扁如  
小豆極堅根長者三四尺麤細不定皮赤上有橫梁梁  
下皆細根採得去蘆頭及赤皮陰乾用以堅實斷理者  
爲佳謂之粉草其輕虛縱理及細韌者不堪用味甘平  
無毒最爲衆藥之主治七十二種乳石毒解一千二百

般草木毒調和衆藥故有國老之號生用瀉火熱熟用散表寒其性能緩能急而又協和諸藥使之不爭惟中滿嘔吐嗜酒者忌用昔有中烏頭巴豆毒者甘草入腹卽定加大豆其驗奇應嶺南解蠱毒凡飲食先取炙甘草一寸嚼之嚥汁若中毒隨吐出仍以炙甘草三兩生薑四兩水六升煮二升日三服常帶數寸隨身備用若含甘草食物而不吐是無毒者也頭生用能行足厥陰陽明二經汙濁之血消癰疽腫痛之毒宜入吐藥稍生用治胸中積熱去莖中痛加酒煮玄胡索苦楝子尤佳

**彙考增**

梁書宕昌國傳天監四年王梁彌博來獻甘草

當歸詔以爲使持節都督河涼二州軍事安西將軍東  
羌校尉河梁二州刺史隴西公宕昌王 〔西陽雜俎〕秀  
才權同休元和中下第旅遊蘇湖間遇疾貧窘走使者  
本村野人僱已一年矣疾中思甘豆湯令其市甘草僱  
者久而不去但具火湯水秀才且意其怠於祇承復見  
折樹枝盈握仍再三搓之微近火上忽成甘草良久取  
麤沙數掬按按已成豆矣及湯成與甘豆無異疾亦漸  
瘥 〔夢溪筆談〕本草注引爾雅云藟大苦注甘草也藟  
延生葉似荷青莖赤此乃黃藥也其味極苦謂之大苦  
非甘草也甘草枝葉悉如槐高五六尺但葉端微尖而  
糙澀似有白毛實作角生如相思角作一本生熟則角

拆子如小扁豆極堅齒嚙不破 霏雪錄西土甘草大

者如柱土人以架屋唐愚士西遊親見之

**集藻**五言律詩 增宋梅堯臣司馬君實遺甘草杖美草

將爲杖孤生馬嶺危難從荷篠叟寧入化龍陂去與秦人採來扶楚客衰藥中稱國老我懶豈能醫

**別錄****原**炙法長流水蘸濕炙透爲熟刮去赤皮或用漿水有云用酒及酥炙者非也

### 黃耆

**原**黃耆

本草綱目云耆長也色黃爲百藥之長故名今俗通作芪或作著者非

一名芰草

一名蜀脂一名百本一名獨樁一名戴樁一名戴穆葉扶疎作羊齒狀似槐葉而微尖小又似蒺藜而微濶大

青白色開黃紫花大如槐花結小尖角長寸許獨莖或  
作叢生枝幹去地二三寸根長二三尺以緊實如箭筈  
者良味甘微溫無毒隴西者溫補白水者冷補赤色者  
作膏消癰腫其皮折之如綿出綿上故名綿黃者綿上  
沁州有白水者白水陝西同州赤水者赤水鄉屬隴西木耆功用並同而  
力不及白水者木耆短而理橫今人多以苜蓿根假作  
者苜蓿根堅而脆亦名土黃莖能令人瘦黃莖能令人肥宜辨黃耆之功  
有五補諸虛不足一也益元氣二也壯脾胃三也去肌  
熱四也排膿止痛活血生血內托陰疽爲瘡家聖藥五  
也治氣虛盜汗自汗及膚痛是皮表之藥治咯血柔脾  
胃是中州之藥治傷寒尺脈不至補腎臟元氣乃上中

下內外三焦之藥也苗嫩時亦可燂淘作茹食收其子  
十月種如種萊法

**彙考**

**增**

梁書鄧至國傳國居西涼州界天監元年詔以

鄧至王象舒彭爲督西涼州諸軍事號安北將軍五年  
舒彭遣使獻黃耆四百斤馬四匹

**原**

本草衍義唐許

肩宗初仕陳爲新蔡王外兵叅軍時柳太后病風不能  
言脈沉而口噤肩宗曰旣不能下藥宜湯氣蒸之藥入  
腠裏周時可瘥乃造黃耆防風湯數斛置於牀下氣如  
煙霧其夕便得語也

**集藻**

**詩散句**

**增**

金王特起但說今年秋雨多黃芪滿谷

無人采

別錄原製用凡使勿用木耆草形相似但葉短根橫綿耆則否須去頭上皺皮槌扁蜜水塗炙數次以透爲度

### 人參

原人參

古作藹又作蔘本草綱目云年深漸浸長成者根如人形故名陶弘景別錄云一名人微微乃

淺字

一名血參

一名黃參

色黃屬土而補脾胃生陰血故有二名

一名神

草

其根如人形有神故名神草

一名地精

廣雅云地精人蔘也

一名土精

見異苑

一名人銜

其成有階級故名人銜

一名鬼蓋

其草背陽向陰故名鬼蓋

一名海

映一名皺面還丹舊以上黨爲佳今不復采邇來所用

皆遼參高麗參

別錄云生上黨山谷及遼東吳氏本草云或生邯鄲本草注云生百濟高麗蜀

本草云沁州遼州澤州箕州平州易州檀州幽州娉州并州并出唐本草云潞州紫團山所出者謂之紫團參

圖經云河東諸州及泰山皆有之又有河北及閩中來者名新羅參蒙筌云紫團參紫色稍扁百濟參白堅且

黃羣芳譜

藥譜

黃耆

人參

四

圓名白條參俗名羊角參遼東參黃潤纖長有鬚俗名黃參獨勝高麗參近紫體虛新羅參亞黃味薄綱目云上黨今潞州民以人參爲地方累不復采取今所用者皆是遼參其高麗百濟新羅三國皆屬於朝鮮其參猶來中國互市

大抵人參春生苗多於深山背陰椶漆樹下潤濕處初生小者三四寸許一椶五葉四五年後兩椶五葉未有花莖十年後生三椶年深者生四椶各五葉中心生一莖俗名百尺杵三四月有花細小如粟蕊如絲紫白色秋後結子七八枚如大豆生青熟紅自落泰山出者葉榦青根白江淮出者形味皆如桔梗欲試上黨參使二人急走三五里一含參一空口其含參者不喘乃真也遼參連皮者黃潤纖長色如防風去皮者堅白如粉秋冬采者堅實春夏采者虛軟高麗參類雞腿者



力大僞者皆以沙參薺芩桔梗造作亂之沙參體虛無  
心而味淡薺芩體虛無心桔梗體堅有心而味苦人參  
體實有心而味甘微帶苦自有餘味俗名金井玉闌干  
者是也性微寒無毒別錄云微溫調中開胃補五臟安精神  
定魂魄止驚悸通血脈主五勞七傷男婦一切虛損痰  
弱虛促短氣止渴生津及胎前產後諸病開心益智久  
服輕身延年其有手足面目似人形者更神效謂之孩  
兒參而假僞者尤多

**彙考**

**增**

晉書石勒載記勒居武鄉北原山下草木皆有

鐵騎之象家園中生人參花葉甚茂悉成人狀

南史

隱逸傳阮孝緒母王氏有疾合藥須得生人參舊傳鍾

山所出孝緒躬歷幽險累日不逢忽見一鹿前行孝緒感而隨後至一所遂滅就視果獲此草

**原**隋書五行

志高祖時上黨有人宅後每夜有人呼聲求之不得去宅一里所但見人參一本枝葉峻茂因掘去之其根五尺餘具體人狀呼聲遂絕

**春秋**運斗樞搖光星散而

爲人參人君廢山瀆之利則搖光不明人參不生

**禮**

斗威儀下有人參上有紫氣

**增**異苑人參一名土精

生上黨者佳人形皆具能作兒啼昔有人掘之始下鐮便聞土中呻吟聲尋音而取果得人參

**卓異記**駱瓊

採藥北山月夜見紫衣童子歌曰山涓涓兮樹蒙蒙明

月愁兮當夜空煙茂密兮垂枯松遂於古松下得參一

本食之而壽 〔海藥本草〕新羅國所貢人參有手足狀  
如人形長尺餘以杉木夾定紅絲纏飾之 〔本草衍義〕  
上黨參有長及一尺餘者或十岐者其價與銀等稍爲  
難得土人得一窠則置板上以新綵絨飾之 〔夢溪筆〕  
談王荊公病喘藥用紫團山人參不可得時薛師政自  
河東還適有之贈公數兩不受人有勸公曰公之疾非  
此藥不可治疾可憂藥不足辭公曰平生無紫團參亦  
活到今日竟不受

**集藻** **贊** **增** 高麗人人參贊三楹五葉背陽向陰欲來求  
我椒樹相尋

五言古詩 **增** 宋蘇軾紫團參寄王定國 谿訝土門口突

元太行頂豈惟團紫雲實白俯倒景剛風被草木真氣  
入茗潁舊聞人銜芝生此羊腸嶺纖撒虎豹鬣蹙縮龍  
蛇癭蠶頭試小嚼龜息變方騁矧予明真子已造浮玉  
境清宵月挂戶半夜珠落井灰心寧復然汗喘久已靜  
東坡猶故目北藥致遺秉欲持三桮根往侑七轉鼎爲  
予置齒頰豈不賢酒茗 小圃人參上黨天下脊遼東  
真井底玄泉傾海腴白露灑天醴靈苗此孕毓肩股或  
具體移根到羅浮越水灌清泚地殊風雨隔臭味終祖  
禰青樞綴紫萼回實墮紅米窮年生意足黃土手自啓  
上藥無炮炙斲齧盡根柢開心定魂魄憂恚何足洗麋  
身輔吾軀旣食首重稽

七言律詩

**增**

唐皮日休友人以人參見惠因以詩謝之

神草延年出道家是誰披露記三椶開時的定涵雲液  
勵後還應帶石花名士寄來消酒渴野人煎處撇泉華  
從今湯劑如相續不用金山焙上茶  
謝友人惠人參五葉初成椶樹陰紫團峰外卽雞林名  
參鬼蓋須難見材似人形不可尋品第已聞升碧簡攜  
持應合重黃金殷勤潤取相如肺封禪書成動帝心  
宋楊萬里謝人寄紫團參新羅上黨各宗枝有兩曾參  
果是非入手截來花暈紫聞香已覺玉池肥舊傳飲子  
安心妙新擣珠塵看雪飛珍重故人相問意爲言老矣  
共思歸

七言絕句

**增**

唐段成式與周爲憲求人參少賦令才猶

強作衆醫多識不能呼九莖仙草真難得五葉靈根許  
惠無 周繇以人參遺段柯古人形上品傳方志我得  
真英白紫團慚非叔子空持藥更請伯言審細看

詩散句

**增**

唐韓翃佳期別在春山裏應是人參五葉齊

別錄

**原**

種植

子熟時收取於十月下種一如種菜法若

春初生苗時移根種之亦可活

收藏

人參易蛀見風

日尤易蛀惟納新器中密封可經年不壞又盛過麻油  
磁器泡淨烘乾入華陰細辛相間收之可久又用淋過  
竈灰曬乾罐收亦可

製用

正旦未明佩紫赤囊中盛

人參木香如豆樣時時嚼吞日出乃止號迎年佩

沙參

**原**沙參一名羊乳一名羊婆奶一名苦心

本草綱目云宜于沙地故

名沙參其根多白汁故俚人呼爲羊婆奶卽別錄所謂羊乳此物無心味淡而別錄一名苦心又與知母同名不知所

謂也一名文希一名識美

**增**

本草一名白參

以其色白

也一名鈴兒草

象花形也

一名志取

**原**色白味淡種宜沙

地二月生苗葉如初生小葵葉而圓扁不光莖高一二

尺葉尖長如枸杞葉而小有細齒秋月葉間開小紫花

如鈴五出白蕊亦有白花者結實如冬青實中有細子

霜後苗枯根生沙地者長尺餘大一虎口黃土地者短

而小根莖皆有白汁八九月採者白而實春採者微黃

而虛味苦微寒無毒人參專補脾胃元氣因而益肺與

腎內傷元氣者宜之沙參專補肺氣因而益脾與腎金受火尅者宜之一補陽而生陰一補陰而制陽

### 薺芩

**原薺芩**

爾雅云芩薺芩注云薺芩

一名杏參一名杏葉沙參一名芪

芩一名甜桔梗

本草綱目云根如沙參而葉如杏故河

謂之甜桔梗

一名白麴根苗名隱忍苗高二尺莖青白葉

似杏葉小而微尖背白邊有叉牙杪間開五瓣白罌子花根如野葫蘿蔔頗肥皮色灰黝中間白毛亦有開碧花者嫩苗燥熟水淘可油鹽拌食根換水煮亦可食又可蜜煎味甘寒無毒解百藥毒殺蠱毒壓丹石發動署毒箭治蛇咬辟沙蝨短狐毒寒而利肺甘而解毒藥中



良品也語云薺萑亂人參故詳著之

### 桔梗

**原**

桔梗一名梗草一名白藥一名薺萑

本草綱目云桔梗薺萑乃一類

有甜苦二種故本經桔梗一名薺萑而今俗呼薺萑爲甜桔梗也

一名利如一名符扈

一名房圖

見吳普本草

生嵩高山谷及宛句今處處有之二

三月生苗嫩時可煮食根如指大黃白色莖高尺餘葉似杏葉而長四葉對生夏開小花紫碧色頗類牽牛花秋後結子八月採根關中所出根黃其皮似蜀葵根莖細青色葉小而青似菊葉性辛微溫有小毒治心腹脹痛胸脇痛如刀刺腸鳴血積痰涎嗽逆口舌生瘡赤目腫痛清肺氣利咽喉破癥瘕治鼻塞除腹中冷痛小兒

廣羣芳譜

藥譜一

薺萑

桔梗

九